



## **SPEECH 11 NOVEMBER 2019**

Nos ta rekonosé presensia di nos Gouverneur, Ministernan i eks ministernan di Gobièrnu di Kòrsou, miembronan di parlamento, eks mandatarionan, dignatarionan, miembronan di gerensia i hunta di supervishon di nos hospital, nos koleganan i eks koleganan i tur invitadonan.

Spesialmente nos ta rekonosé tambe presensia di nos obispu di Willemstad, Pastornan di e diferente parokianan aki na Kòrsou, i tambe nos ta rekonosé nos pastor ku a karga ku nos hospital tur tempu, esta pastor Gabriel. Boso presensia awe serka nos aki na St. Elisabeth hospital ta nifiká hopi pa nos.

Di e forma aki, nos ta konsiderá ku e protokòl nesesario a keda sirbí.

Ayera tardi nos a keda gratamente sorprendí, di e forma kon e organisashonnan di Otrobanda huntu ku e konseho di iglesianan aki na Kòrsou a organisá un enkuentro aki dilanti riba lugá di parker di nos hospital pa di e forma ei yama SEHOS danki pa lokual e hospital a nifiká pa Kòrsou den e 164 añanan ku ta tras di lomba. Nos no tin palabra sufisiente pa mustra nos gratitut pa e gesto ei. Na e enkuentro ei, nos a duna spich kaminda nos a duna un rekorido den tempu, kon e hospital a kuminsá na 1855 i ku desde 1857 aki na Rif a kuminsá ku e konstrukshon di nos edifisio i kon esaki traves di e añanan a keda ekspandé.

Nos no a para masha ketu ayera na e forma kon e fundashon i esunnan di promé ora di nos hospital a realisá e trabou aki i kiko esaki a nifiká pa nos isla.

Nos ta un isla chikí den laman di Karibe. Nos tin mas o ménos 150.000 hende ta biba riba e isla aki. Nos tin nos kustumbenan i tambe nos tin un historia. Kompará ku paisnan di promé mundu, nos historia ta parse kòrtiku, pero den bida tur kos ta relativo i pa nos, nos historia ta importante i ta esei ta pone ku nos ta awe e lokual ku nos ta.

Nos komunidat a kambia den transkurso di añanan. Diferente grupo di hendenan ta biba riba nos isla i pa nos esei ta parse un kos normal, miéntras ku na otro partinan di mundu, hendenan ta bringa ku otro pa motibu di diferensianan ku nan por tin.

Nos ku a nase despues di 1954 (e aña di statüt) a lanta ku e idea i ku e konosementu ku ta normal ku tur hende ku ta biba riba nos isla ta igual i ku nan a keda kreá riba nos isla ku e providensia di nos kreator i ku e pensamentu aki ta bini ku sierto derechinan emansipatorio ku no por keda aliñá for di niun persona. E forma kon un gran parti di nos komunidat ta pensa awendia riba nos bida, nos libertat, nos felisidat i nos salú ta e evidensia di e ideanan aki.

Pero si nos tene kuenta ku e echo ku nos hospital a keda fundá na 1855 i ku sklabilitut a keda abolí na 1863, esta 8 aña despues, nos por komprondé tambe, e situashon di nos komunidad den e tempu ei, ku a pone ku misa katóliko a funda e hospital Sint Elisabeth i a inyektá e organisashon aki ku un mishon di bondat, kompashon, i empatia pa ku esunnan ku mas mester di ayudo i kuido den e tempu ei, bou di e lema 'ALLES VOOR ALLEN'.

Awendia pa nos ta normal ku nos ta ferwagt e kompetensia nan aki di un hospital, pero den e tempu ei komunidad tabata agradesido na Señor ku e hospital katóliko ei a yuda nan, nèt e ora ku nan ta tin mester mas di esei.

Tempu ta kambia. Nos emansipashon kolektivo komo un pueblo ta sigui su kaminda i awe na 2019, esta 164 aña despues, Kòrsou ta yega na un punto traves di su gobièrnu, ku e komunidad mes ta asina emansipá ku e mes ke tin i operá un hospital general aki na Kòrsou.

Nos di SEHOS tambe ta kontentu ku nos hospital nobo i manera nos a bini ta informá, splika i akklará nos ta sostené e realse di e hospital aki den tur sentido. Nos no ta hasi esaki ku palabra so, pero nos ta sostené e hospital aki ku nos akshonnan tambe.

Por tabata tin hopi diskushon den pasado ku ta SEHOS mester ta e hospital nobo. Hopi den nos sosiedat ta splika awendia ku e hospital nobo no ta SEHOS, pero un ta e mesun hendenan ku a laborá na SEHOS, mañan ta laborá den e hospital nobo.....?

Progreso den un komunidad no ta bini di mes, esta si nos lidernan, den konsulta ku komunidad, no pusha nos desaroyo den un direkshon, ku kolektivamente nos ke pa nos desaroyo bai. Di otro banda si nos komunidad inkonsientemente ta biba den un ignoransia, nos, kolektivamente lo no yega na e desaroyo ku nos tur ta anhelá. Pa nos tin éksito akinan komo un sosiedat nos mester keda tene kuenta ku nos historia i siña di e lèsnan di pasado. Hopi bes nos ta diskutí ku otro pa gana e diskushon ei, pero nos lo por ta hopi mas efektivu den e debate kolektivo, si realmente nos ke respetá otro, nos ke aseptá otro komo igual, i ku nos realmente ke skucha otro riba kualkier tema. Últimamente e eks presidente di Merka, Obama a splika, ku nos mester tin e pensamentu ku tur lider mester ta perfekto, pasombra esei nunca lo no ta asina. Nos mester aseptá e bèrdat aki tambe di otro pa nos tin progreso.

Si nos para ketu na tur e elementonan aki pa nos yega na progreso, i si nos sigui e historia di SEHOS i spesialmente e historia di e hendenan ku a forma SEHOS, nos por siña hopi for di esaki. Nos forma di emansipá individualmente pero tambe kolektivamente no ta dependé di enseñansa so, pero tambe e ta dependé di e forma kon nos ta forma nos mes.

E fundashon SEHOS i su historia, por ta un instrumento hopi bálido i konkreto pa nos usa aki na Kòrsou pa informá i akklará un parti di nos historia i asina pasa dor, e norma i balornan ku kleronan a siña nos den pasado i asina konsientisá i duna nos komunidad e posibilidat pa forma su mes den e direkshonnan ku e ta deseá, i voral den e quadro ei duna Kòrsou e posibilidat ku e por sigui pone e progreso di su futuro den e markanan di pia di su historia. Pronto SEHOS lo kuminsá duna e informashon aki na sosiedat.

Tur despedida naturalmente ta hasi doló. Esei ta e preis ku nos tur mester paga pa progreso, pero si nos sa ku e progreso ei ta brinda nos e oportunidat pa otro desafionan bálido pa nos komunidad, esei ta duna nos forsa pa sigui ku e kambionan nesesario. I komunidad di Kòrsou por ta trankil, ku nos di SEHOS lo karga e responsabilidad ei.

Nos ta hopi agradecido ku nos hospital por a sirbi pueblo di Kòrsou. Nos ta yama danki na esunnan di promé ora ku tabata para na e inisio di nos hospital. Nos ta yama danki na Iglesia katóliko ku e la laga su fielnan hasi e trabou di bondat aki. Nos ta yama danki na tur e personal, sea di misa i e profeshonalnan ku a bai nos dilanti pa hasi di nos hospital lokual ku e la bira awe. Nos ta yama danki na tur nos trahadónan i tambe dòkternan ku a traha aki den nos hospital. Nos ta yama danki na gobièrnunan di turno ku no opstante tur kos, a keda ku e konfiansa den nos hospital. Nos ta yama danki na komunidad di Kòrsou pa a laga nos sirbi nan pa 164 aña.

Den un nota mas personal, mi por informá ku pa nos di gerensia, ku a haña e tarea pa trese e hospital te na e punto ku nos ta awe, huntu ku mi koleganan di gerensia, Franke Scheper, Elvis Thode i ku nos otro asistentenan di gerensia, ta hopi orguyoso ku nos a risibí a tarea aki i nos tin sigur ku e trahadónan di SEHOS lo por hasi un bunita trabou den nos hospital nobo.

Masha masha danki.